



浙江文獻集成

范道濟點校

# 查慎行全集

第八冊

中華書局



范道濟  
點校

# 查慎行全集

第  
八  
冊

中  
華  
書  
局

# 敬業堂詩集卷二十三

## 得樹樓集

起丁丑正月，盡十二月。

吾家自喪亂後，僅存橫溪老屋，與兩弟同居。余所棲在西北隅，年深瓦落，不足以庇風雨。丁丑春，大兒倖舉南宮，挈之還家，爰即舊址改築小樓，樓成而老木數十章，皆在几榻間。因取少陵詩意，顏曰得樹。

人日同孫松坪張漢瞻楊晚研宮友鹿錢亮功方拱樞吳元

朗蔣揚孫家德尹集王赤抒邸舍分賦上元燈八首

四垂羅帶影飄飄，一綫中懸愛細腰。莫傍市門輕銜影，有人依樣要偷描。  
瓶口紅光忽吐蛻，醉人相對舌如箕。却因酒具名相似，記起花時鳥勸提。  
右葫蘆燈。  
傴僂聊爲秉燭游，似曾閱世笑蜉蝣。朱門光景番番換，幾輩相看到白頭。

故紙形容大可憐，敢同南極指星躔。誇人只有香山老，張丈前頭炫少年。  
右老人燈。

鱗鬣粧成畫不如，竿頭擎出晚晴初。九衢塵淨月如水，一隊人隨一隊魚。

星橋鎖動沸波濤，人海中間湧巨鰲。多少書蟬曾飽死，讓他枵腹事焚膏。  
右魚燈。

一幅輕紗隔座深，芸牕小立夜沈沈。不爭六曲屏山好，虛費人間屈戌金。

三尺孤光一片冰，當筵珠翠照何曾。眼昏已少看花分，更隔看花霧一層。  
右屏風燈。

## 二月杪南歸涿州道中遇雪十八韻

頗訝今年雪，方知此地寒。春深猶漠漠，野闊更漫漫。咳吐紛珠玉，飛揚富羽翰。近從煙際辨，遠入霧中看。鴻爪輕留跡，楊花滾作團。風輪旋蟻磨，車轍轉蜩丸。銀海光相耀，瓊田暖未殘。密防蟲戶啟，細補鵲巢完。淺草勾尖沒，枯株萬木攢。千家如畫裏，雙塔指城端。石滑經橋怯，沙平取徑難。幾曾填窰井，特爲顯峰巒。席帽融冰濕，征衣燎火單。茅茨雖易壓，穴隙莫相鑽。對爾吟慚郢，催余鬢比潘。勿愁燈焰短，直愛酒升寬。朔候何當變，泥塗不肯乾。明朝有奇計，酩酊上歸鞍。

連日車行泥淖中朝來僱短驢自固城至安肅縣凡兩墮鞍

即事有感

雪消春水發，古道窪然低。客行忽落此，局促如鷄棲。兩車同隻輪，六馬併一蹄。力盡甫脫險，阨深復無蹊。長恐雪繼作，有渰雲萋萋。晨興天色佳，日脚垂虹蜺。跨驢橫短策，快比駿馱馱。西南見郎山，刻露出角圭。寧知一往氣，世路偏多迷。蹶跌豈及防，康莊有排擠。前行苟無失，遲速理亦齊。還來車上坐，且免衣沾泥。

保定旅次閱邸抄得從弟東亭及兒建南宮捷音口占志喜

兼寄嘲老友姜西溟

邸報傳來樂事重，一尊相屬慰浮蹤。青春三月客懷好，白髮半頭歸興濃。子弟聯翩同榜羨，家門成就老夫慵。探花却入少年隊，試問髯姜可勝儂。時姜亦成進士。

渡三汊河聞前路泥乾喜而有作

三汊河畔水濺濺，洗盡春泥上渡船。從此騎驢似騎鶴，折條垂柳當歸鞭。

## 晚抵安平縣

野曠天高落日紅，近城煙氣忽如籠。楊椿綠上鴟棲處，草意青回馬跡中。昔夢尚驚泥活活，歸心還怕雨濛濛。衰遲自分邀天幸，坎陷迴車路未窮。

## 大風過深州城外

驚沙袞袞日黃黃，不料東風爾許狂。茅屋捲空留破柱，酒旗吹折剩萸楊。幾家賣餅枯壕畔，一老扶犁大道旁。爲話連年秋潦苦，出車畿甸正輸糧。

## 曉渡衡水橋風色甚寒小飲市樓

石古橋滑臨奔湍，衡漳流濁同桑乾。高樓下瞰岸千尺，美酒大書旗一竿。帽絮蒙頭欲敗意，魚羹饌聊加餐。杏花全未有開信，知是北來風色寒。

## 棗強道中喜晴

斷雲開四望，初日解重陰。野氣浮天動，煙光薄樹深。疲牛尋故跡，老馬得歸心。題徧旗

亭壁，何人識苦吟。

### 客有稱高唐州爲縣駒里者戲成絕句

野語齊東最易訛，縣駒遺俗近如何。自從一變崑山調，不是吳兒不善歌。

### 大道曲

荒鷄聲遲月落早，行人出門看參昴。一條大道飛古塵，歲歲何曾長春草。我欲疊作山，羊腸九折爭躋攀。我思鑿成水，溷人出沒波濤裏。直教馬無四足車輪方，此路始應春草長。

### 穀城山

東阿城東穀城趾，傳是仙家舊鄉里。圯橋老叟果何人，能致留侯跪進履。《兵書》一卷既不傳，事往無徵正在此。秦皇凶暴蔑賢聖，偶語詩書皆棄市。布衣起自泗上亭，溲溺儒冠固其理。此非可以正道說，詭託《陰符》自茲始。竟參帷幄佐奇謀，躡足時時還附耳。大蛇中斷群雄滅，走狗旋烹舊臣死。舞陽活自女嬃偷，蕭相生遭獄吏恥。子房遠禍蓋有道，直視侯封同敝屣。神仙之說誠渺茫，有托而逃斯隱矣。陋儒讀書寡深識，異事人人徵太

史。後來競指黃石公，當日原無赤松子。我爲此語豈好奇，石若有知呼可起。

### 清明後一日同戴田有弟東亭兒克建重游濟寧南池

露氣霞光水洗鮮，孤城深入鏡中天。杏花風暖高樓笛，柳色煙濃隔浦船。蠟屐半生凡幾兩，青袍一夢忽三年。壯心敢擬桓宣武，直爲攀條也自憐。

### 黃河打魚詞

桃花春漲衝新渠，船船滿載黃河魚。大魚恃強猶掉尾，小魚力薄唯噉水。魚多價賤不論斤，率以千頭換斛米。河壩大潦秋不登，今年兩稅姑停徵。但願田荒免逋賦，與官改籍充漁戶。

### 大風渡黃河舟中與長源姪對局

柳絮春狂剪渡風，片帆飛下急流中。船頭已達長淮岸，一局殘棋劫未終。

## 過揚州示崔性甫楊曉先兩同年

不到紅橋已八年，有人柳下記停船。楊郎落第崔郎病，縱使同游越可憐。

## 閏三月朔日蝕舟中遇雨紀事

丁丑閏三月，日食法當既。明星晝當見，從卯當至未。白晝如昏黃，果然伊可畏。舟行拚偃卧，閉目聊自慰。何來打篷聲，雨點驟如沸。皇天閔垂象，下土雲蓊鬱。似欲弭此災，而爲不祥諱。我聞日當食，不食乃足貴。豈有晦昧晨，又蒙霾霧氣。將毋陰太盛，推驗得髣髴。六師方犁庭，櫓槍掃敵愾。佇清沙漠塵，聲教朔南暨。公卿滿臺閣，賀表辭不費。五事占休徵，竊疑非此謂。天變雖偶然，民勞亦宜暨。野人語無擇，托興在薈蔚。不敢學盧仝，險艱殊少味。

## 初到家戲謝戚黨之見賀者

趁伴攜兒出帝畿，到家猶及換春衣。遠煩親友來相賀，不道余仍下第歸。

## 兒建赴殿試北上詩以示之

今年夏苦旱，六月未徂暑。兒子將北行，衝炎逐徒旅。留之又不可，遣去無多語。汝名已倖成，汝力正須努。天子方右文，策名在當宁。萬言應廷對，有抱期畢吐。煌煌鐘虞懸，叩擊諧律呂。自從制科設，得士凡幾許。置汝於其間，太倉特一黍。然而勿自薄，儕輩盡翹楚。同年百五十，若者指可數。父事中有人，姜西溟，吾癸酉同榜；嚴寶仍，吾同學老友也。雁行敢兄序。功名亦時至，非可有意取。造物吝虛名，齒角肯兼予。吾宗兩太史，荊州兄，聲山姪。並簞搏風羽。盛事傳一時，借居鄰韋杜。雖云官禁近，未免索米苦。汝今往暫依，慎勿希華廡。秋深決歸計，且復返鄉土。久甘南巷貧，差勝北門竄。千薪尚壅積，銓注十纔五。從政雖多途，不如科目舉。讀書想先輩，既進或慚沮。豈必一第邀，便思行綰組。閉門更力學，合轍驗今古。却出作選人，於世冀小補。而翁百念灰，自審莫若處。諄諄向臨發，庭誥述父祖。吾但當弄孫，門戶全付汝。

## 得樹樓初成以詩落之九首

百年計樹人，十年計樹木。辛勤荷先澤，以有此老屋。兵火乃幸存，曩基方改築。勞生竟

何得，去此空馳逐。誓收湖海蹤，歸掃一庭綠。樓成名得樹，外是非吾欲。

五架初度材，謂在百金內。銖銖累木石，所費奚啻倍。貧家舉事難，輕發每追悔。連朝責逋負，工藝集群喙。將爲逃債臺，一笑付聾聵。

列垣周四隅，與樓勢迴環。憑高無遠矚，胡以開心顏。竅壁延綠陰，少見天疑慳。別添一小閣，忽湧海外山。豁然百里目，乃在圭竇間。

貞白居三層，元龍卧百尺。神仙彼可致，豪氣我非昔。方當狎斯人，未許校什伯。敢云去地遠，稍與鷄豚隔。尚恐鳥雀群，移巢避生客。

一榻雖已安，終慚自爲計。心長髮苦短，力不及諸弟。前人締造艱，親歷始知勤。撫茲念堂構，補葺當次第。身在吾敢辭，茫茫配根蒂。用少陵《四松》詩中語。

設梯盡十級，偃僂連雕尻。日上能千回，兒孫捷飛猱。阿翁貪靜坐，嗔嚇時一遭。形神既未忘，那免陟降勞。習勞亦不憚，所戒舉趾高。

卑濕苦舊棲，老根連草蔓。新來稍軒敞，恰直樹之半。雖除螻蟻緣，却被蝸蟬亂。朝眠與晝坐，鳴聒傍几案。推牕驚不去，疏響或一斷。喧寂兩聽之，老夫化成見。

夕陽轉庭西，樹影來牆東。龍蛇動戶牖，始知天有風。開襟亟當之，快若逃虛空。人間正炎熱，置我微涼中。

竹垞工八分，大字作擘窠。爲余題歲月，惜墨不費磨。懸之樓中央，筆勢翻江河。疑挾風雨至，颯然散高柯。時時卧其下，所得良已多。

### 樓上看雨

卧聞牀下殷輕雷，起拓南窗八扇開。牆缺雲流山影去，樹頭風截雨聲來。一鳩逐婦移陰立，雙燕將雛取勢回。我本無田還望歲，略分餘潤到蒼苔。

### 題周兼畫南唐小周后真六首

人間姊妹工相妒，遺恨茫茫豈有涯。惻悵瑤光梅信晚，一枝潛進未開花。  
湘裙如水不擡風，鳳味攜來倒挂紅。色色丹青無著處，泥金一縷在雙弓。  
月暗花明霧氣多，盈盈羅襪步凌波。外間誰管深宮事，偷唱新聲子夜歌。  
不須更減一分肌，周昉繇來善貌肥。如此丰姿如此畫，當初猶道未勝衣。  
開寶初元議禮遲，待年承寵已多時。在廷只有韓熙載，曾托元和諷諭詩。  
垂鬟分綰髮初長，想是南朝時世粧。指與俗工從未識，可憐絕筆付周郎。  
時兼惜已下世。

## 晚景

晚景蟲聲入，空庭易夕陽。鵲巢風更穩，鶴骨露初涼。病葉非關蠹，秋花不取香。物情閒處得，吾轉惜流光。

## 次韻答顧搢玉

失學負壯年，東西逐烏兔。蹉跎髮漸絲，落拓衣仍布。希心躡前踵，回首却故步。歌筑混屠沽，唱酬雜縑素。歸來稍稍悔，事去種種悟。庶望針砭加，奚啻雪霜雨。去聲。雖蒙同人憐，或恐異己妒。之子負高才，於余枉佳句。紛然蓬麻中，直拔千尺樹。溫恭具真性，磊砢得奇趣。何期天畔鴻，狎此沙頭鷺。知音世不遭，敢惜肝膽露。鷄鳴風雨晦，旅館燈燭暮。明朝走相尋，戶外有二屨。由來意氣合，詎若邂逅遇。君家門地高，舊是雲間顧。昂藏自殊衆，標榜不在互。問途慚已經，吾老乃迷路。

## 雨夜過徐淮江二首

萍浮梗泛久西東，每過南湖憶此翁。斷港船通新漲水，空庭樹拔去年風。五經自課佳兒

讀，半刺曾嫌俗客通。好是扣門能不拒，一燈重對雨聲中。

草堂南畔小池幽，一片蘆聲夢穗秋。滿壁詩牋存歿淚，積年書疏往來郵。閒追昨夢驚彈指，老剩貧交幸到頭。未免對君還自媿，桑榆晚景亟宜收。

八月十六日同鄭春薦嚴定隅吳紫莓家潤木湖頭小飲風

雨大作泊舟湧金門外是蚤襍被而出晚來興盡入城戲

作一律邀諸子並和

及到繁華地，翻成寂寞游。煙波三百頃，風雨一孤舟。山好偏宜澹，湖空易作音佐。秋。却防漁父笑，襍被不曾留。

### 種菜四章

晚豆尚沿籬，秋瓜已除架。畦丁惜地利，菜子及時下。功力積纖毫，滋培仰造化。勾萌達新雨，布綠密無罅。一句可分蒔，半畝不待借。用東坡事。既足散其餘，猶能乞音氣。鄰舍。

灌溉既已勤，其長亦奮迅。窠窠盡發洩，生意不少吝。連朝風日晴，秋蟻忽成陣。灑灰得方法，經驗始深信。幸是力能施，何難手除疢。黍苗被蟲食，四野年不順。老圃奪天工，

忍饑聊免饑。

晚菰雖弱植，不怕霜雪加。秋種春可蒔，盤餐佐貧家。根株諒無幾，口腹豈有涯。人間賣菜傭，求益方紛拏。禦冬吾有計，旨蓄良足誇。

杜陵客西川，種藝頗有園。清晨送菜把，乃感地主恩。茲事吾不取，恐爲貪夫援。於世苟無求，食力稍自尊。英雄亦如此，無事且閉門。

## 九日獨行園池上看木芙蓉

雨後罷登高，杖藜惜腰腳。園荒少秋菊，無以慰寂寞。兩株木芙蓉，紅白正聯萼。忽然失明鏡，萍漲水將涸。坐使雙嬋娟，影妍無處著。空持好顏色，脉脉自開落。應得主人憐，新晴走赴約。吾衰減情累，於物何厚薄。不忍廢重陽，逢花還命酌。

## 友人齋中看菊

幽人如晚卉，愛傍籬邊游。瓦盆薦茅齋，高下凡千頭。紅紫豈不好，黃花乃吾秋。森然群豔中，正色與目謀。競賞違衆嗜，獨吟發孤愁。泉明不可作，孰與偕唱酬。

## 喜又微姪自南昌歸

共客洪州幕，回頭十五年。未成宗炳卧，各有尚平牽。身健貧何礙，吟深句必傳。故鄉稀酒伴，日日望歸船。

## 傷庭前牡丹四首

別樣風光散綺羅，豪家亭榭占春多。天公直似相欺得，不爲茅齋剩一窠。  
兩行枯卉列東西，綠上苔痕路不迷。夜月魂歸吾望汝，半年猶護種花泥。  
自知未到忘情處，幾度徘徊惜好枝。不獨我憐人亦爾，空欄客過立移時。  
依稀一夢閱繁華，草沒庭荒野老家。省却暮年多少事，灰心從此不栽花。

## 觀刈早稻有感

襪襖相逢半壓肩，刈禾爭趁老晴天。蒹葭對岸遮鄰屋，蚱蜢如風過別田。地瘠不知豐歲樂，民勞尤望長官賢。誰知疾苦無人問，秋稅新增戶口錢。吾邑戶籍十萬，每丁歲輸力役之征。今年忽從田賦加派，數百年舊制壞矣。